



partii naleraq

UKA2015/148

02.10.2015

**Uunga siunnersuut: Suliffissarsiuussinermut, ilitsersuinermut piginnaanngorsaanermullu sullissiviit pillugit Inatsisartut inatsisaat nr. xx, yy 2015.**

(Inuussutissarsiornermut, Suliffeqarnermut, Niuernermut Nunanullu Allanut Naalackersuisoq)

Partii Naleqqap suliffissaaleqisut annikillisartuarnissaanik siunertaq suungaluartorluunniit tunngaviatigut tapersersorpaa, soorlu siorna upernaakkut ataatsimiinnermi aamma siunertamut tassunga partiit allat peqatigalugit siunnersuuteqarnikuusugut. Taamaattumik siornatumut kusanartumut timitalimmik, kinguneqartumik iluarseriaasoqarsinnaappat qularata tapersiissuugut.

Tamannalu aamma tunngavigalugu Partii Naleraq siorna suliffissaaleqineq pillugu illuatungiliuttut naalackersuisooqatigiillu oqallimmata tamakkiisumillu tapersiinerat tunngavigalugu avataaniit suliaartortunik akuersisarnermut erseqqisaanermik siunertalimmik siunnersuuteqaraluarnitta paasinanngittumik allaffisornikunaasiit naallerneqarnera paasiuminaatsittorujuarput, uffali ersarissumik sulisartut kattuffiani paasineqarlunilu siunnersuut taperserpeqartoq. Inuiaqatigiinnut kipiluttunartumik killeqarnerput iliuuseqarfiginiarlugu immitsinnut naallerarunnaarniarta.

Taamaattumik aallarniutitsinni allannitsituut inuiaqatigiit kalaallit suliffissarsiortut sulisinnissaanut aalajangersaanerit tamaasa tunngaviatigut tapersersornitsituut una oqaaseqarfigissuarput.

Partii Naleqqamiit eqqaareernikuungaluarlugu eqqaaqqillarput, kalaallit atugarissaarnerulernissaat tunaartarilluinnarlugu maani inersuarmi suliniuteqaratta, tassanilu "Naalagaaffeqatigiinneq" minnerpaamilluunniit kalluarneqarnersoq kalluarneqannginnersorluunniit tunngavilersuinermi peqataatinneqarmat eqqumiiginartilluinnaratigu Partii Naleqqamiit akuersaarsinnaanngilarput. Soorlu aamma eqqumiiginartoq uani inatsisissamat suliaqarnermi ilaatigut tunngavilersuinermi tikinneqaaqattaartoq Danmarkimi kommuunit aqunneqarnerani pissutsit, allaat aperersunnarluni ila taama Namminersornerulernikuunerput aammalumi Namminersulernikuunerput isumaqanngitsigaa? Ila susoqartoruna? Taamannak kalaallit atugarissaarnerulernissaannik siunertaqarluni maani inersuarmi pimoorussilluni sulinitsinni tamakku inatsisiliornermi tunngavilersuutigineqaleraangata qulaani apeqqutit allatut ajornartumik qaffakaalertarput, allaannginnami asuli mittataaginnaleqqasugut. Sooq tamakku tikinneqassappat, Naalackersuinikkut namminermik aalajangersaasinnaanngissusermik ersersitsineruppaat? Kissaammiallanngittoornanngilaq, allaannginnami tamakku sakattannginnissaat Naalackersuisunut pingaarnerusoq suliffissaaleqisunik sulisitsinerulernissamiit.

Tamakkua erloqinarsinnaasut saniatigut aamma tusarniaanermi akissutit qissimikkaanni tassani ilaatigut KANUKOKA oqariartuuteqarpoq uuma siunnersuutip kommuunit nammineersinnaatitaaneranut killiliisoq.

Partii Naleqqamiit isumaqarluinnarpugut uani sulititsilernissaq qitiulluinnartariaqartoq pisortallu kommuuniuppata Namminersorlutilluunniit Oqartussaappata inatsimmik isiginninnerat imminnut assortuuppat taava tamakku aaqqittariaqartut suliffissarsiortoq pilliutigittinnagu, taamaattumik Naalakkersuisut Partii Naleqqamiit piumaffigissuagut uani siunnersuummi tamakku aporfiusinnaasut aaqqinniaqqullugit, tamakkulu qulakkeerneqarsinnaappata, taava siunertamut naapertuutumik kinguneqartitsisinnaappat Naalakkersuisut qularissanngikkaat Partii Naleqqap tapersersuinissaa.

Taamattut piumasaqarluta siunnersuutip aappassaaneerneqannginnerani ataatsimiititaliami sukumiisumik qulaajangassat qulaajarsinnaassappatigit siunertamut naapertuuttumik aalajangersaasoqassasoq, taava Partii Naleraq ilaliisunut peqataajumaarpoq.

Qujanaq